

序

考自周禮鹽人掌鹽之政令以供百事之鹽祭祀供其鹽鹽散鹽賓客供其形鹽散鹽王之膳羞供其飴鹽鹽鹽者味甘而鹹卽今河東之池鹽是已則鹽之爲用其來已久固不始於管子與鹽筴之論夫鹽爲天地自然

之利佐司農賦稅之供而閭閻黎庶
安能淡食是鹽之有關於國計民生
者甚大何郡邑志乘多畧而不載詎
非闕失歟我

皇上以聖人御宇百度維新

命天下鹽臣纂修鹽志以定一代之章程
而垂於無窮甚盛典也初長蘆鹽法

志書成鹽臣莽鵠立

題請

御製序文因係畿輔重地蒙

皇上特允所請

睿藻輝煌照耀千古嗣因浙江撫臣李衛
遵修兩浙鹽志進

呈并援例懇請

御製序文經戶部議以鹽課地方甚多若
使各處奏請

宸翰似屬太繁查鹽政一切程式典章課
額經費其大者載入

會典其詳悉者則地方大吏與董事
各員深知原委今兩浙鹽法志書序
文相應卽令該撫李衛撰文序入奉

旨纂修之由以昭

聖主恤商愛民之至意其已經修成之雲
貴鹽志應交與總督鄂爾泰兩廣鹽
志應交與總督孔毓珣甘肅四川鹽
志應交與總督岳鍾琪各撰文一篇
其未曾纂修告成之兩淮鹽志應交
與巡撫陳時夏福建鹽志應交與總

督高其倬河東鹽志應交與巡撫石
麟各撰文一篇載入鹽法志書內可
也等因於雍正五年八月二十五日
具

奏奉

旨依議欽此欽遵相應行文各該督撫遵
奉

旨內事理欽遵并知照兩淮河東鹽政可
也臣石麟荷蒙

聖恩畀以晉撫重任接准部咨隨即欽遵
咨准河東鹽臣碩色移送河東鹽法
志書到臣詳加繙閱按河東禹貢冀
州之域天文參觜分野蓋緣河起西
域歸於東海始流而北迤邐而東經

靈朔間詰曲而南郡當左境故曰河
東也明稱平陽府轄三十四州縣我
朝因之雍正二年陞蒲解隰吉絳等州
爲直隸而縣之屬府者僅三之一雍
正六年陞蒲州爲府其實鹽之行於
境內者三十四邑外澤潞而已然而
南達淮源西極汧隴行三省之疆域

皆因其地而制宜者也河東鹽產於
池池介解安之交山之麓近安邑者
爲東池近解州者爲西池名雖有二
實一池耳廣五十一里袤七里幅員
百一十六里渟泓浩渺漣漪映天鹽
根附土糾蟠纏結是池也水畜硝板
上止數寸以故旱則病枯底深岸高

客水易趨以故雨又病潦不枯不潦
則日曝水凝而成鹽板南有風洞勝
著中條以時薰發出聲隆隆池水被
之板上花生鹽顆自呈古惟集工撈
採收自然之利李唐以後有治畦澆
曬之法是以人力代天工矣鹽之品
類最夥大約生乎天而成乎人陰爲

體而陽爲用故有煮海而成者薊遼
山東兩淮廣南閩浙之鹽是也有浥
水於井成造法同煮海者西蜀滇黔
之鹽是也有浥水沃土或值雨過土
白刮淋鹿煮而成者管井之鹽是也
有崖砧崔嵬雨滋日暎積如磬霜刮
取卽可充食者階成蘭鳳之鹽是也

東坡志林卷之八
更有龍城剛鹵形似蒺藜其下有鹽
纍碁而生如異物志所云者巴東胸
臆井在北崖鹽水自凝中突邊鋪狀
同傘子如陶弘景所云者再有木鹽
依樹蓬鹽依草要之雨露沾濡水爲
類矣日火皆陽爍水作味其用仍一
卽或化成自天人力不與總非二氣

磅礴與氤氲之淡者不能惟此解鹽
曬取雖與廟灣花馬之法同而薰風
自南鹽成昕夕作味甘鹹功用神速
誠莫之與並矣但池鹽成於水而敗
於水欲其成而無敗惟渠堰是賴渠
以洩諸水而導之外出堰以障諸水
而防其內入不豫計而爲之所池將

東傳...
潰溢鹽於何有故必乘時濬築俾其
涇固則治水無非治鹽也是志也爲
目二十有六曰鹽池曰禁垣曰畦地
曰種治曰渠堰曰山澤曰灘地曰引
目曰課額曰商人曰支掣曰運程曰
律例曰鹽法曰官職曰運城曰公署
曰積貯曰池廟曰祥異曰運學曰武

備曰宦蹟曰人物曰疏議曰藝文爲
卷一十有二綱舉目張條分縷晰尋
原竟委援古証今凡所以護池保鹽
疏引裕課庶富教養之道靡弗備載
官斯土者覽是書因其良法美意悉
心體察力而行之其有裨於鹺政良
非淺鮮豈僅曰補郡邑志乘之闕失

而已哉敬附一言弁諸簡端使轉運
河東之鹽與買食河東之鹽者皆知
聖天子恤商愛民之至意洵足昭垂於億
萬斯年矣

雍正五年歲次丁未嘉平之吉巡撫
山西太原等處地方提督鴈門等關
軍務兼理雲鎮都察院右副都御史

加二級紀錄一次臣覺羅石麟奉

勅謹序